# НЕДЕЛЯ ТРЕТЬЯ СВЯТЫХ ПОСТОВ.

Поклонение празднуем Честнаго и Животворящего Креста.

# В субботу вечера, на малей вечерни,

Стихиры На 4. Глас 6.

Подобен: Ангельския:

Стих: От стражи утренния до нощи, от стражи утренния, \* да уповает Израиль на Господа.

**Н**ыне Ангельская воинства копиеносят Древо Честное, \* благоговейно окружающа, \* и вся созывающа верныя на поклонение. \* Приидите убо постом просветившиися, \* припадем ему радостию и страхом, \* верно зовуще: \* Радуйся Честный Кресте, \* мира утверждение.

Стих: Яко у Господа милость и многое у Него избавление \* и Той избавит Израиля от всех беззаконий его.

## Паки таяжде стихира

Стих: Хвалите Господа вси языцы \* похвалите Его вси людие.

Да Адамову потребиши клятву, \* плоть нашу приемлеши кроме скверны, \* распинаешися же и умираеши, Иисусе Преблагий; \* темже Крест Твой, и копие, \* губу же и трость, гвоздие верно почитаем, \* и воскресение Твое видети просим.

Стих: Яко утвердися милость Его на нас \* и истина Господня пребывает во век.

Заключает Едем древом древле змий, \* древо же Креста отверзает Сей \* всем хотящим постом и слезами очиститися. \*Приидите убо предлежащее видяще, \* тому припадем со страхом вернии зовуще: \* отверзи Врата Небесная Кресте, любящим тя.

# Слава и ныне, глас и подобен тойже.

Егда Кресту пригвождена виде Слове Божий, \* безсеменно Тебе рождшая, взываше вопиющи: \* увы Мне Чадо сладчайшее, \* кое Твое смирение Боже Мой? \* како безстрастный страсть терпиши, неправедным судом? \* песнословлю Твое страшное крайнее снисхождение.

# На стиховне стихиры подобны. Глас 2:

Подобен: Доме Евфрафов:

Разрешившеся уз \* древняго осуждения, вернии \* древом Креста, \* на нем пригвожденнаго \* Христа славословим.

Стих: Возносите Господа Бога нашего, \* и покланяйтеся подножию ногу Его, яко свято есть.

Прииди ныне с нами Давиде, \* цевницу движи, \* Христа возносите поя, \* вернии поклонитеся \* Его подножию.

Стих: Бог же царь наш прежде века, \* содела спасение посреде земли.

**В**ознесем людие \* предлежащее древо, \* имже спасение \* нам Христос подает, \* и верою целуем.

# Слава и ныне, глас и подобен тойже: Крестобогородичен:

**В**ознесена на Кресте, \* за человеки, \* видящи Твоего Сына Дево, \* вопияще рыдающи: \* слава благоутробию Твоему.

Таже, Ныне отпущаещи: Трисвятое. По Отче наш:

# Тропарь, глас 1:

Спаси Господи люди Твоя, \* и благослови достояние Твое, \* победы на сопротивныя даруя, \* и Твое сохраняя Крестом Твоим жительство.

И бывает отпуст. По отпусте же входит священник со екклисиархом в сосудохранительницу, и вземлют Честное Древо, предъидущу свещнику и кадилу, поющим тропарь: Спаси Господи люди Твоя: И приносят на Святую Трапезу, и вжигают свещу на всю нощь.

# НЕДЕЛЯ ТРЕТЬЯ СВЯТЫХ ПОСТОВ. На Велицей Вечерни,

На **Г**осподи воззвах: поставим стихов 10. И поем стихиры Осмогласника на 6, воскресны 3 и Анатолиевы 3. Таже и Триоди 4 стихиры , глас 5.

Подобен: Радуйся, постников:

Стих: От стражи утренния до нощи, от стражи утренния, \* да уповает Израиль на Господа.

Возсияй, Господень Кресте, \* светолучныя молния Твоея благодати, \* в сердца чтущих Тя, \* и Богоприятною любовию приемлющих, мировожделенне, \* имже слезное потребися сетование, \* и смертных сетей избавихомся, \* и к присному веселию приидохом. \* Покажи красоты Твоея благолепие, \* воздаяние подаждь воздержания рабом Твоим, \* верно просящим Твое Богатное заступление, \* и велию милость.

Стих: Яко у Господа милость и многое у Него избавление \* и Той избавит Израиля от всех беззаконий его.

Радуйся, живоносный Кресте, \* Церкве красный раю, \* древо нетления, \* прозябшее нам вечныя славы наслаждение; \* имже бесовстии отгоняются полцы, \* и ангельстии свеселятся чинове, \* и совокупления верных празднуют. \* Оружие непобедимое, \* утверждение нерушимое, \* царей победо, священников похвало, \* Христовы ныне страсти и нам подаждь достигнути, \* и велию милость.

Стих: Хвалите Господа вси языцы \* похвалите Его вси людие.

Радуйся, живоносный Кресте, \* благочестия непобедимая победа, \* дверь райская, \*верных утверждение, \* Церкве ограждение, \* имже тля разорися и упразднися, \* и попрася смертная держава, \* и вознесохомся от земли к небесным; \* оружие непобедимое, \* бесов сопротивоборче, \* славо мучеников, \* преподобных яко воистинну удобрение, \* пристанище спасения, \* даруяй міру велию милость.

Стих: Яко утвердися милость Его на нас \* и истина Господня пребывает во век.

Гряди, первозданная двоице, \* лика отпадшая горних, \* завистию человекоубийцы, \* горькою сластию древа, древле вкушением. \* Се всечестное воистинну древо пред-грядет, \* к Немуже притекше радостию облобызайте, \* и возопийте к Нему с верою: \* Ты наше воззвание, Кресте всечестный, \* Древо Богоблаженное, Саде Небесный; \* Егоже плода причастившеся, нетление улучихом, \* Едема перваго приемше известно, \* и велию милость.

### Слава, глас 3:

**Х**ристе Боже наш, \* вольное распятие во общее воскресение рода человеческаго восприемый, \* и тростию Креста, обагрением червленым Своя персты окровавивый, \* оставительная нам царски подписати человеколюбствовавый, \* не презри нас бедствующих, \* и паки от Тебе разстояние; \* но ущедри, едине Долготерпеливе, \* во обстоянии люди Твоя, \* и востани, побори борющия ны, яко всесилен.

# И ныне, догматик гласа.

Вход. Свете тихий:

# На литии же, яко обычно, стихира храма.

Слава и ныне, глас 5:

**З**рящи Тя тварь вся на Кресте нага висяща, \* Содетеля и Зиждителя всех, \* изменяшеся страхом, и рыдаше; \* солнце же свет омрачи, \* и земля колебашеся, \* камение же разседашеся, \* и храма светлость раздирашеся. \* Мертвии восташа от гробов, \* и ангельския силы ужасошася, глаголюще: \* О, чудесе! Судия судится, \* и страждет хотя за спасение мира, и обновление.

# На стиховне стихиры Осмогласника.

Слава, и ныне, глас 4:

Пособивый, Господи, кроткому Давиду \* победити иноплеменника, \* верным людем нашим споборствуй, \* и оружием Креста низложи враги наша; \* покажи, Благоутробне, на нас древния милости Твоя, \* и да разумеют воис-тинну, яко Ты еси Бог; \* и на Тя надеющиися побеждаем, \* молящиися обычно Пречистей Твоей Матери, \* дароватися нам велицей милости.

**Н**ыне отпущаеши: По Трисвятом тропарь **Б**огородице Дево: дважды, и Крестный единожды. Глас 1:

Спаси Господи люди Твоя, \* и благослови достояние Твое, \* победы на сопротивныя даруя, \* и Твое сохраняя Крестом Твоим жительство.

И прочее последование бдения, яко обычно.

# НЕДЕЛЯ ТРЕТЬЯ СВЯТЫХ ПОСТОВ. На Утрени,

По шестопсалмии, Бог Господь: во глас Осмогласника, и глаголем тропарь воскресен дважды.

Слава, Крестный, глас 1:

Спаси Господи люди Твоя, \* и благослови достояние Твое, \* победы на сопротивныя даруя, \* и Твое сохраняя Крестом Твоим жительство.

# И ныне, Богородичен:

Гавриилу, вещавшу Тебе Дево, радуйся, \* со гласом воплощашеся всех Владыка, \* в Тебе, Святем Кивоте, \* якоже рече праведный Давид: \* явилася еси ширшая небес, \* поносивши Зиждителя Твоего. \* Слава всельшемуся в Тя, \* слава прошедшему из Тебе, \* слава свободившему нас Рождеством Твоим.

## И обычное стихословие.

Седальны глаголем воскресны. По полиелеи, [аще где храм честнаго Креста] седален Креста, глас 8.

Подобен: Повеленное тайно:

**В** раи убо прежде древом обнажи о вкушении враг, нанося умерщвление: Креста же древо, живота одеяние человеком нося, наведе на земли, и мір весь исполнися всякия радости. егоже видяще покланяема, Богу в вере людие согласно воззовем: исполнь храм славы Его. Дважды.

И обычное стихословие: и прочее последование.

По 1-м и 2-м стихословии седальны воскресны, гласа:

И полиелей. Степенны гласа. Прокимен, и Евангелие утреннее рядовое. псалом 50.

Слава, глас 8: Покаяния отверзи ми двери Жизнодавче, \* утренюет бо дух мой ко храму святому Твоему, \* храм носяй телесный весь осквернен: \* но яко щедр, очисти \* благоутробною Твоею милостию.

И ныне, Богородичен: **Н**а спасения стези настави мя Богородице, \* студными бо окалях душу грехми, \* и в лености все житие мое иждих: \* но Твоими молитвами \* избави мя от всякия нечистоты.

Таже, глас 6: Помилуй мя Боже, \* по велицей милости Твоей, \* и по множеству щедрот Твоих, \* очисти беззаконие мое.

**М**ножества содеянных мною лютых, \* помышляя окаянный, \* трепещу страшнаго дне суднаго: \* но надеяся на милость благоутробия Твоего, \* яко Давид вопию Ти: \* помилуй мя Боже по велицей Твоей милости.

Каноны Октоиха: Воскресный со ирмосом на 4, и Богородицы на 2. Таже Триоди на 8, творение кир Феодора Студита. **Ирмос:** Воскресения день, \* просветимся, людие: \* Пасха, Господня Пасха! \* От смерти бо к жизни \* и от земли к небеси \* Христос Бог нас преведе, \* победную поющия.

Торжества день, востанием Христовым, смерть безвестна показася, жизни возсия заря, Адам востав ликует радостию: темже воскликнем, победную поюще.

Поклонения день честнаго Креста, приидите к сему вси: востания бо Христова зари, светосияяй предлагает ныне, того облобызаим душевно радующеся.

**Я**вися великий Господень Кресте, покажи ми зрак Божественный красоты твоея ныне, достойно поклонника хвалы твоея: ибо яко одушевленну тебе, и возглашаю, и облобызаю тя.

Да восхвалят согласно небо и земля, яко предлежит всем всеблаженнейший Крест, на немже пригвожден телесне пожреся Христос: того лобызаим душевно радующеся.

Слава, Троичен: О Троице начертаньми! о Единице зраком! Отче, Сыне и Душе, Единосильная Единице, в совете и хотении, и державы начале, мір твой сохрани, мир подающи.

Богородичен: **И**скуса никакоже ведущи мужеска Дево, безсеменно раждаеши Младенца, чисто носиши Рождение, міра Творца Христа Бога: Того моли умирити всяческая.

Катавасиа: Божественнейший прообрази древле Моисей, \* в Чермнем мори провед Израиля Крестом Твоим, \* воду жезлом пресек, \* песнь Тебе исходную воспевая Христе Боже.

#### Песнь 3.

**Ирмос:** Приидите, пиво пием новое, \* не от камене неплодна \* чудодеемое, \* но нетления источник, \* из гроба одождивша Христа, \* в Немже утверждаемся.

**П**риидите, песнь поим нову, разрушение адово торжествующе: из гроба бо Христос воскресе, смерть пленив, и спасе всяческая.

**П**риидите, почерпем вернии, не от источника источающаго воду тленную, но от источника просвещения, Креста Христова поклонением, о немже и хвалимся.

Древле егоже прообразоваше Моисей дланьма, Крест Твой ныне облобызающе, умнаго Амалика побеждаем, Владыко Христе, имже и спасаемся.

**О**чима и устнама чистыма поюще песнь радования, Господню Кресту радостию поклонимся вернии, плещуще песньми.

Слава, Троичен: **Е**динаго в триех Ипостасех Бога Безначальнаго чту: нераздельнаго Существа зраком, Отца, Сына, и Духа Живаго, в Нихже крестихомся.

Богородичен: **В** купине Моисей Твое образно таинство древле Чистая виде: якоже бо оныя пламень, огнь Божества Твою утробу не опали.

**Катавасия:** Утверди Владыко Христе Крестом \* на камени мя веры, \* не поколебатися уму \* прилоги врага злаго; \* Един бо еси свят.

## Седален, глас 6:

**К**рест Твой Господи, освятися: в нем бо бывают исцеления болящым во гресех: имже Тебе припадаем, помилуй нас.

Стих: Возносите Господа Бога нашего, и покланяйтеся подножию ногу Его, яко свято есть.

Днесь пророческое исполнися слово: се бо покланяемся на место, идеже стоясте нозе Твои Господи: и древа спасения вкусивше, греховных страстей свободу улучихом, молитвами Богородицы, Едине Человеколюбче.

Слава: **Т**окмо водрузися древо Христе Креста Твоего, основания поколебашася смерти Господи: Егоже бо поглоти желанием ад, отпусти трепетом. явил еси нам спасение Твое Святый, и славословим Тя Сыне Божий, помилуй нас.

И ныне, Богородичен: **Б**огородице Дево, моли Сына Твоего пригвождшагося волею на Кресте, и воскресша из мертвых, Христа Бога нашего, спастися душам нашым.

#### Песнь 4.

**Ирмос:** На Божественней стражи \* богоглаголивый Аввакум \* да станет с нами \* и покажет светоносна Ангела, \* ясно глаголюща: \* днесь спасение миру, \* яко воскресе Христос, \* яко Всесилен.

Се воскресе Христос, мироносицам женам Ангел рече: не рыдайте, шедше рцыте апостолом: радуйтеся, днесь спасение міру, мучительство врага смертию разрушися.

Живоноснаго Твоего Креста, поклонную радость днесь Христе сретающе, предсретение творим всесвятыя страсти Твоея, юже во спасение міра соделал еси Спасе, яко всесилен.

Днесь бывает радость на Небеси и на земли, яко Христово знамение міру является Крест треблаженный: сей бо предложен быв, источает кланяющымся ему радость приснотекущую.

**Ч**то Ти принесем Христе, яко честному Кресту дал еси нам поклонитися; на немже всесвятая кровь Твоя излияся, идеже и плоть Твоя гвоздьми водрузися, егоже облобызающе ныне благодарим Тя.

Троичен: **Е**динаго Божества пою три Ипостаси, нераздельно, естественне просто проповедая, Отца Безначальна, Сына, и Духа Святаго Сопрестольна, Господство едино, и едино Царство, едину Державу присносущную.

Богородичен: **Е**дина в женах явилася еси вещь пречудна Чистая, слышание страшное: естество бо ты обновила еси, без семене рождши, пребывающи паки якоже прежде Дева: родивыйся бо из Тебе, Бог есть Истинный.

**Катавасиа:** На Кресте Тя Сильне, \* светило великое видев, \* трепетом взятся, лучи сопрятав скры, \* вся же тварь воспе со страхом \* Твое долготерпение: \* ибо исполнися земля Твоего хваления.

#### Песнь 5.

**Ирмос:** Утренюем утреннюю глубоку \* и вместо мира песнь принесем Владыце, \* и Христа узрим правды Солнце, \* всем жизнь возсияюща.

**В**озсиял еси от гроба незаходимый Свете, міру облистая нетление, потребил еси Господи смертный плачь от конец, яко Благоутробен.

**П**риступим очищеннии воздержанием, тепле облобызающе во хвалении Древо всесвятое, на немже Христос распинаемь, спасе мір, яко Благоутробен.

∧икуют в веселии ангельстии чини, днесь Креста Твоего поклонением: тем бо низложил еси бесовския полки, спасый Христе человечество.

Рай другий познася Церковь, якоже прежде древо имущая живоносное, Крест Твой Господи, из негоже прикосновением безсмертию причастихомся.

Слава, Троичен: Собезначальны Три славлю, Единаго Существа: Бога Отца, Сына, и Духа, Свет един трисиятельный, купно державное Царство, в неслиянном тождестве.

Богородичен: **Р**одила еси естества законом, но паче закона: Тебе бо единыя безсеменно Рождество, страшный и помышляемый нрав, и глаголемый рождения Твоего, Всенепорочная.

**Катавасиа:** Утренююще Тя воспеваем, \* Спасе Щедре, \* мир обретше Крестом Твоим, \* имже обновил еси род человеческий \* ко свету невечернему вводя нас.

## Песнь 6.

**Ирмос:** Снизшел еси в преисподняя земли \* и сокрушил еси вереи вечныя, \* содержащия связанныя, Христе, \* и тридневен, яко от кита Иона, \* воскресл еси от гроба.

Воскресл еси смерть упразднив Христе, якоже великий Царь, от адовых сокровищ воззвал еси нас в наслаждение Царства Небеснаго, в землю безсмертия.

Плещуще песньми Божественными вернии, воскликнем Богу, Крест Господень целующе: освящения бо источает источник, всем сущым в міре.

**И**сполняется песнописательный глас: се бо покланяемся пречистых ног Твоих подножию Всесильне, Кресту Твоему честному, тривожделенному древу.

**Е**же виде древо в Твой хлеб вложеное, во пророцех рыдатель, Крест Твой Щедре облобызающе, воспеваем Твоя узы, и погребение, копие же и гвоздия.

**Н**а рамех егоже изволил еси Христе носити святый Крест, и на сем вознестися, и распятися плотию, облобызающе собираем крепость на враги невидимыя.

Троичен: **Е**диницу в триех начертаниих пою, и Троицу во едином естестве покланяемую, Бога трое купно, Свет Трисолнечный, Отца, и Сына, и Святаго Духа.

Богородичен: **Ч**удес великое чудо в тебе явися Нескверная Агнице, вземлющаго бо міра грех, Агнца родила еси: Егоже моли прилежно о поющих Тя. **Катавасиа: Образ Божественнаго Креста, \* Иона во чреве китове простертыма \* дланьма проначерта, и взираше \* спасен от зверя силою** 

Твоею, Слове.

# Кондак, глас 7. Самогласен.

**Н**е ктому пламенное оружие \* хранит врат Едемских: \* на тыя бо найде преславный соуз древо крестное, \* смертное жало, и адова победа прогнася. \* Предстал бо еси, Спасе мой, \* вопия сущим во аде: \* внидите паки в рай.

Икос: Три кресты водрузи на Голгофе Пилат, два разбойников, и един Жизнодавца. егоже виде ад, и рече сущым доле: о слуги мои, и силы моя! кто водрузив гвоздие в сердце мое, древяным мя копием внезапу прободе; и растерзаюся, внутренними моими болю, утробою уязвляюся, чувства моя смущают дух мой, и понуждаются изрыгати Адама, и сущыя от Адама, древом данныя ми: древо бо сия вводит паки в рай.

#### Песнь 7.

**Ирмос:** Отроки от пещи избавивый, \* быв Человек, \* страждет яко смертен, \* и страстию смертное \* в нетления облачит благолепие, \* Един благословен отцев Бог \* и препрославлен.

**В**оскресл еси из гроба тридневно, яко спяй Господи, адовы вратари поразив Божественною силою, и древния воздвиг праотцы Едине Благословенный отцев Боже, и Препрославленный.

Цевницею песней ликующе возрадуемся днесь людие, крестным поклонением на сем пригвоздившагося Христа славяще, Единаго Благословеннаго отцев Бога, и Препрославленнаго.

Показавый умерщвления орган, жизни делателище, міру облобызательное, Твой Крест Всещедре, тому покланяющыяся освяти, Едине Благословенный отцев Боже, и Препрославленный.

**Е**дине Милостиве и Благоутробне, просвети, освяти Едине Иисусе, покланяющыяся верно Твоему Кресту, и Божественным страданием, Едине Благословенный отцев Боже, и Препрославленный.

Слава, Троичен: **Е**диницу в триех Ипостасех, пою Божество: Свет бо Отец, Свет Сын, Свет Дух, свету нераздельну пребывающу, единством естественным, и треми лучами Лиц сияющу.

Богородичен: **В**сех пророк многоименитое ты еси Проповедание, врата бо Божия, Ручка златая, Земля святая, явилася еси Дево Богоневестная, рождшая плотию Иисуса Христа, отцев Бога, и Препрославленна.

**Катавасиа:** Из пламене отроки избавлей, \* плоть приим пришел еси на землю, \* и на Кресте пригвожден, \* спасение нам даровал еси Христе, \* Един Благословен отцев Боже, \* и Препрославлен.

#### Песнь 8.

Ирмос: Сей нареченный и святый день, \* Един суббот Царь и Господь, \* праздников праздник \* и торжество есть торжеств: \* воньже благословим Христа во веки.

**М**уро в руках что держите всяко; кого же взыскуете; ныне явлейся юноша во гробе, вопия: воскресе Христос и Бог наш, возставивый естество человеков от адовых сокровищ.

Радуйся требогатое древо и Божественное, Кресте, свете сущым во тьме, четвероконечный мір сиянием твоим, востания Христова проявлей зари, сподоби вся верныя достигнути Пасху.

**В** сий день благоухают мура Божественныя муроположницы, живомурственное древо Крест Христов: обоняим его Богодухновенныя вони, тому покланяющеся верно во веки.

Гряди Елиссее пророче, рцы яве, что древо оное, еже в воду вложил еси; Крест Христов, имже от глубины тли извлекохомся, тому покланяющеся верно во веки.

Древле Иаков прообразуя Крест Твой Христе, Иосиф покланяшеся божественнаго жезла краеви, скиптр сей страшный Царствия Твоего предвидев: емуже ныне покланяемся верно во веки.

Благословим Отца, и Сына, и Святаго Духа, Господа.

Троичен: **Е**дино в триех начертаниих Существо славя, не сливаю единолично триех, ниже пресецаю зрака, Отца, и Сына, со Духом: Един бо над всеми Бог в Троице.

Богородичен: **Е**дина в матерех явилася еси Дева Богоневесто Марие, без мужа родивши Христа Спаса, чистоты знамение сохранивши: Тебе ублажаем вернии во веки.

Хвалим, благословим, покланяемся Господеви:

**Катавасиа:** Руце в ров верженый львов, \* иногда великий во пророцех, \* крестообразно простер Даниил, \* неврежден от сих снеди спасеся, \* благословя Христа Бога во веки.

На 9-й песни поем, Честнейшую: Песнь 9.

**Ирмос:** Светися, светися, новый Иерусалиме: \* слава бо Господня на тебе возсия, \* ликуй ныне \* и веселися, Сионе. \* Ты же, Чистая, красуйся, Богородице, \* о востании Рождества Твоего.

**В**о гроб сошел еси Жизнодавче и Боже, и сокрушил еси вся заклепы же и вереи, и мертвыя воскресил еси, слава востанию Твоему, вопиющыя, Христе Спасе Всесильне.

Гроб Твой жизнь мне Христе источи, содержай бо жизнь, представ возопил еси живущым во гробех: сущии во узах разрешитеся, Аз бо міра избавление приидох.

Песньми да взыграют вся древа дубравная, тезоименитое древо Креста зряще облобызаемое днесь: на немже Христос вознесе главу, якоже пророчествует божественный Давид.

Древом умерый, древо тя обретох жизни христоносне Кресте мой, хранителю мой нерушимый, на демоны крепкая державо, тебе покланяяся днесь зову: освяти мя славою твоею.

**В**еселися, радуйся Церковь Божия, древу требогатному покланяющися днесь, всесвятаго Креста Христова: емуже служат чинове Ангельстии, и со страхом предстоят.

**Троичен: Т**роице лицы, Единице естеством покланяюся, Тебе Божество Святое, Отцу, и Сыну, со Святым же Духом, Единому Началу, Единому Царству, всеми владычествующему.

Богородичен: Гора великая в Нюже вселися Христос, Ты явилася еси Дево, якоже божественный Давид вопиет: Еюже мы вознесохомся к Небеси, всынившеся духом Всеблаженная.

Катавасиа: О Мати Дево, \* и Богородице неложная, \* рождшая безсеменно Христа Бога нашего, \* на Крест вознесшагося плотию, \* Тя вернии вси достойно \* с Ним ныне величаем.

> По 9-й песни: Свят Господь Бог: Ексапостиларий утренний воскресный. И Креста.

> > Подобен: Со ученики:

**К**рест Христов честный днесь предложенный видевше поклонимся, и верно возвеселимся, облобызающе любовию, на сем волею распеншагося просяще Господа, сподобити всех нас, и Кресту честному поклонитися, и достигнути Воскресение неосужденно.

И ныне, Богородичен: Древу, на немже Всечистая, пречистеи длани о нас простре, пригвоздивыйся Сын Твой, ныне благочестно покланяющымся, даждь нам мир, и міроспасительныя всечестныя страсти предварити, и светлой мірорадостной господоименитой Пасце поклонитися, и светоносному Дню.

На хвалитех поставим стихов 8, и поем стихиры воскресны осмогласника 4: и трипеснца подобны 3, повторяюще 1, глас 4.

Подобен: Яко добля:

Стих: Хвалите Его в тимпане и лице, \* хвалите Его во струнах и органе.

**В**о гласех воскликнем, \* в песнех возвеличим, \* Крест Честный облобызающе, \* и к Нему возопиим: \* Кресте всечестне, \* освяти наша души и телеса силою твоею, \* и от всякаго вреда сопротивных соблюди невреждены, \* благочестно покланяющияся Тебе.

Стих: **Х**валите Его в кимвалех доброгласных, хвалите Его в кимвалех восклицания, \* всякое дыхание да хвалит Господа.

**П**риступивше, почерпите неистощаемых вод, \* Креста благодатию проливаемых: \* се предлежащее видяще Древо Святое, \* дарований источник, \* напоеное кровию и водою Владыки всех, \* на том волею вознесшагося, \* и земныя воздвигшаго.

Стих: Возносите Господа Бога нашего, \* и покланяйтеся подножию ногу Его, яко свято есть.

Церкве утверждение, царей держава, \* монашествующих похвала и спасение, \* ты еси Кресте Всечестне; \* темже покланяющеся Тебе, \* и сердцем и душею просвещаемся днесь, \* божественною благодатию на Тебе пригвоздившагося, \* и державу льстиваго разорившаго, \* и клятву потребльшаго.

Стих: Бог же царь наш прежде века, \* содела спасение посреде земли. И повторяюще первую стихиру, таже глаголем стих:

#### Глас 6:

Стих: Воскресни, Господи Боже мой, да вознесется рука Твоя, \* не забуди убогих Твоих до конца.

**В**ысокомудраго разума злых фарисеев, \* всех Господь притчею убежати сего научи; \* и не высокомудрствовати паче, \* еже подобает мудрствовати, \* всех наказа, прописание и образ Сам быв, \* даже до распятия и смерти, \* Сам Себе излияв. \* Благодаряще убо с мытарем рцем: \* пострадавый за ны, и безстрастен пребывый Боже, \* от страстей нас избави, \* и спаси души наша.

Слава, паки тойже. И ныне: Преблагословенна еси: Славословие великое.

Егда же начинаем пети: Слава в вышних: Тогда приидет иерей оболчен во вся священническия одежды, [или аще где будет старей, то от первейшаго в своих им местех должно есть сему быти]. И взем кадильницу, кадит Святую Трапезу, и Честный Крест, таже подъемлет его на дискосе со хранильницею на главу свою, и исходит от левыя страны престола северными дверьми, предидущым ему свещам двум, и кадильнице, и отходит до царских врат. Скончану же бывшу славословию, и Трисвятому, глаголет священник: Премудрость прости. И начинаем тропарь: Спаси Господи люди Твоя: трижды. И приходит иерей нося Честный Крест пред Святыя Двери: и тамо уготовану четвероножнику, и полагается верху его Честный Крест, и отверз хранильницу, кадит крестообразно от четырех стран. И абие поем тропарь, глас 6:

**К**ресту Твоему покланяемся, Владыко, \* и святое воскресение Твое славим. Трижды.

И начинают покланятися, аще где во обители, игумен или ин первенствуяй во священных, такожде и прочии священницы покланяющеся пред Честным Крестом дважды: целуют же прежде старейшии, и по целовании, паки покланяются единожды: такожде творят и прочии священницы, десная страна и левая. такожде приходит и братия два два покланяющеся по чину их. Кланяющимся же братиям, поем самогласны сия, глас 2:

Приидите, вернии, \* Животворящему Древу поклонимся, \* на немже Христос Царь славы волею руце распростер, \* вознесе нас на первое блаженство, \* ихже прежде сластию украд враг, \* изгнаны от Бога сотвори. \* Приидите, вернии, Древу поклонимся, \* Имже сподобихомся невидимых враг сокрушити главы. \* Приидите, вся отечествия язык, \* Крест Господень песньми почтим: \* радуйся, Кресте, падшаго Адама совершенное избавление! \* О Тебе вернии царие наши хвалятся, \* яко Твоею силою исмаильтеския люди державно покаряющии. \* Тебе ныне со страхом христиане целуем; \* на Тебе пригвоздившагося Бога славим, глаголюще: \* Господи, на Том пригвоздивыйся, помилуй нас, \* яко благ и Человеколюбен.

#### Глас 8:

Днесь Владыка твари, и Господь славы, \* на Кресте пригвождается \* и в ребра прободается, \* желчи и оцта вкушает, \* сладость церковная; \* венцем от терния облагается, \* покрываяй небо облаки; \* одеждею облачится поругания, \* и заушается бренною рукою, \* рукою создавый человека. \* По плещема биен бывает, \* одеваяй небо облаки. \* Заплевания и раны приемлет, \* поношения и заушения; \* и вся терпит мене ради осужденнаго, \* Избавитель мой и Бог, \* да спасет мир от прелести, \* яко Благоутробен.

## Слава, глас тойже:

Днесь неприкосновенный существом, \* прикосновен мне бывает, \* и страждет страсти, \* свобождаяй мя от страстей. \* Свет подаваяй слепым, \* от беззаконных устен оплевается, \* и дает плещи за плененныя на раны. \* Сего Чистая Дева и Мати на Кресте зрящи, болезненно вещаше: \* увы Мне, Чадо Мое, \* что сие сотворил еси? \* красный добротою паче всех человек, \* бездыханный, беззрачный являешися, \* не имея вида, ниже доброты. \* Увы Мне, Мой Свете! \* Не могу спяща зрети Тя, \* утробою уязвляюся, \* и лютое оружие сердце Мое проходит. \* Воспеваю Твоя страсти, \* покланяюся благоутробию Твоему, \* Долготерпеливе слава Тебе.

## И ныне, глас тойже:

Днесь пророческое исполнися слово: \* се бо покланяемся на место, \* идеже стоясте нозе Твои, Господи; \* и древа спа-сения вкусивше, \* греховных страстей свободу улучихом, \* молитвами Богородицы, Едине Человеколюбче.

Таже ектении, и отпуст. Слава, и ныне, стихира евангельская, в притворе: и чтется оглашение Студитово, и час первый, и совершенный отпуст.

# На Литургии,

## Блаженна гласа, на 6, и канона Креста песнь 3-я, на 4.

Древле егоже прообразоваше Моисей дланьма, Крест Твой ныне облобызающе, умнаго Амалика побеждаем, Владыко Христе, имже и спасаемся.

Очима и устнама чистыма поюще песнь радования, Господню Кресту радостию поклонимся вернии, плещуще песньми.

Слава: **Е**динаго в триех Ипостасех Бога Безначальнаго чту: нераздельнаго Существа зраком, Отца, Сына, и Духа Живаго, в Нихже крестихомся.

И ныне: **В** купине Моисей Твое образно таинство древле Чистая виде: якоже бо оныя пламень, огнь Божества Твою утробу не опали.

# Тропарь Крестный глас 1.

Спаси Господи люди Твоя, \* и благослови достояние Твое, \* победы на сопротивныя даруя, \* и Твое сохраняя Крестом Твоим жительство.

## Кондак, глас 7. Самогласен.

**Н**е ктому пламенное оружие \* хранит врат Едемских: \* на тыя бо найде преславный соуз древо крестное, \* смертное жало, и адова победа прогнася. \* Предстал бо еси, Спасе мой, \* вопия сущим во аде: \* внидите паки в рай.

## Вместо же Трисвятаго поем:

**К**ресту Твоему покланяемся, Владыко, \* и святое воскресение Твое славим.

## Прокимен, глас 6:

Прокимен: Спаси Господи люди Твоя, \* и благослови достояние Твое. Стих: К Тебе Господи воззову, Боже мой, да не премолчиши от мене.

## Апостол ко евреям, зачало 311. (4:15 - 5:6)

Братие, имуще убо Архиереа велика, прошедшаго небеса, Иисуса Сына Божия, да держимся исповедания. Не имамы бо архиереа не могуща спострадати немощем нашим, но искушена по всяческим по подобию, разве греха. Да приступаем убо с дерзновением к престолу благодати, яко да приимем милость и благодать обрящем во благовременну помощь. Всяк бо первосвященник, от человек приемлемь, за человеки поставляется на службы яже к Богу, да приносит дары же и жертвы о гресех. Спострадати могий невежствующим и заблуждающим, понеже и той немощию обложен есть. И сего ради должен есть якоже о людех, такоже и о себе приносити за грехи. И никтоже сам о себе приемлет честь, но званный от Бога, якоже и Аарон. Тако и Христос, не Себе прослави быти первосвященника, но Глаголавый к Нему: Сын Мой еси Ты, Аз днесь родих Тя. Якоже и инде глаголет: Ты еси священник во век по чину Мелхиседекову.

Аллилуия, глас 1: Помяни сонм Твой, егоже стяжал еси исперва. Стих: Бог же Царь наш прежде века, содела спасение посреде земли.

Евангелие от Марка, зачало 37. (8:34-9:1)

Рече Господь: иже хощет по Мне ити, да отвержется себе, и возмет крест свой, и по Мне грядет. Иже бо аще хощет душу свою спасти, погубит ю, а иже погубит душу свою Мене ради и Евангелиа, той спасет ю. Кая бо польза человеку, аще приобрящет мир весь, и отщетит душу свою? Или что даст человек измену на души своей? Иже бо аще постыдится Мене и Моих словес в роде сем прелюбодейнем и грешнем, и Сын Человеческий постыдится его, егда приидет во славе Отца Своего со Ангелы святыми. И глаголаше им: аминь глаголю вам, яко суть нецыи от зде стоящих, иже не имут вкусити смерти, дондеже видят Царствие Божие пришедшее в силе.

Причастный: Знаменася на нас свет лица Твоего, Господи.